

SVEVIA ET BAVA

RIA. Nulla natio in Germania tam diu retinuit nomen suum ut Sueui, quippe qui longe fuerunt ante Saxones, Francones & Bauaros. Patuit etiam Suevia olim latissime, ut comprehenderit Brisgoiam, Nigram syluam, Hegoiam, Eregioiam usque Tigurum, Lacum Podamicum, Algoiam, Lechgoiam, Vindeliciam, Vuirtenbergum, Kreichgoiam, Marcam Badensem & Rhetiam que est circa Norlingen. Est autem regio ipsa partim plana & partim montuosa, & satis fertilis, in plerisque etiam locis, potissimum iuxta Neccarum fluvium, vinum proferens. Nil est in ea ociosum, nisi quod paludes & sylvae occupant. Habet autem multas sylvas & frequentem uenationem, abundat & pecoribus, praesertim in Nigra sylua. Sunt in ea plurima oppida, uillae & uici, sed & arces, natura & arte munitae, praesertim in Hegoia sunt arces quales in uniuersa Germania non inueniuntur, in tam editissimis & praecipitibus sitae montibus, quae ueluti propugnacula sunt totius Sueviae. In Sueuia oritur celeberrimus totius Europae fluvius, Danubius, cuius fontem diligenter in hac signaui tabula. Habuit Sueuorum natio a Carolo magni temporibus proprium ducem. De hoc enim Carolo legimus, quod duxerit uxorem filiam Gotfridi ducis Sueuorum, mansitque aliquandiu ducatus apud posteritatem eius. Postea uarij generis habuit duces, ex quibus Hermannus anno Christi 948. dedit unicam filiam suam Ludolpho Ottonis primi imperatoris filio. Et cum Ludolphus iste absque haerede hinc migraret, habuit Sueviae ducatus successiue multos & uarios dominos, nempe Ottonem a Suuinfurd, Rudolphum a Rinfelden, Bertholdum a Zerlingen. Pulso Bertholdo Imperator Henricus quartus tradidit ducatum genero suo Friderico a Stauffen. Hic Fridericus duos habuit filios, Conradum, qui factus est Romanorum rex, & Fridericum qui patri in ducatu successit. Fridericus duos habuit filios, Conradum qui factus est Comes Palatinus, & Fridericum qui factus est imperator & retinuit quoque ducatum. Hic fuit Fridericus primus, cognominatus Barbarossa, & habuit filium Henricum successorem in imperio & ducatu, & hic ducens uxorem filiam regis Siciliae, factus est per eam rex utriusque Siciliae. Cui successit filius eius imperator Fridericus secundus, rex Siciliae & Sueviae. Is autem reliquit duos filios, Conradum & Henricum. Conradus electus in Romanorum regem genuit Conradinum. Alij uero dicunt Conradinum fuisse Henrici filium, fuitque Conradinus ultimus Sueviae dux & legitimus heres utriusque Siciliae. Cumque in Italiam proficisceretur, ut autum Siciliae regnum possideret, nullas insidias suspicatus, subito captus & contemptum circumductus, tandemque innocenter occisus est a Carolo duce fratre regis Francie, cui Romanus pontifex praeter omnem equitatem tradiderat Siciliae regnum, factus innocentis sanguinis traditor. Contigerunt autem haec anno Christi 1267. Quo tempore defecit nobilis ducatus Sueviae, nec dux aliquis in ea regione cum titulo isto surrexit, quanquam Rudolphus ab Habsburg & quidam filiorum eius conati fuerint sibi usurpare hunc titulum, sed quem diu retinere nequieuerunt. Abolito itaque ducatu Sueviae, comites a Vuirtenberg praeter ceteris comitibus quorum plures fuerunt in Sueuia, inualuerunt & plurima loca ex ducatu acquisierunt, donec tandem nostro auctore Comes Eberhardus sublimatus est in ducem Vuirtenbergensem & Teckenensem a Caesare Maximiliano in comitijs Vuormaciensibus anno Christi 1495.

B A V A R I A.

Haec regio olim Noricum & deinde Baioaria fuit appellata, extenditurque in Austrum usque ad Alpes, ab occasu uero terminatur ad Licum fluvium, & a septentrione ad Danubium & nonnihil ultra, ad Bohemicam scilicet usque syluam. Profert ea regio magnam copiam frumenti, vinum uero in paucis crescit locis. Abun-